

NORŪ TAXRE GA POPERA GA CORĪTIUCŪĀX GA YAXŌGŪXŪTANŪWA NAMUXŪ GA PAURU

Pauru rü nüxŭ narümoxē ga yema yaxōgūxŭ ga Corĭtiuwa yexmagūxŭ

¹ Pa Chaueneēgü i Corĭtiucŭāxgü i Tupanaāxŭ yaxōgūxŭ, rü Pa Chaueneēgü i Guxŭma i Acayaanewa Ngēxmagūxŭ, choma i Pauru nixī i pexcèx chanaxümatūxŭ i ñaã popera wūxigu namaã i taeneē i Timutéu. Rü choma nixī i Tupana choxŭ yaxuxŭ na Ngechuchu ya Cristu choxŭ muxŭ na nüxŭ chixuxŭcèx i norü ore. ² Rü tanaxwèxe na Tanatü ya Tupana rü tórü Cori ya Ngechuchu ya Cristu pexna nanaxã i norü ngechaxŭ rü norü taãxŭ.

Pauru rü ngúxŭ ninge

³ Rü toma rü nüxŭ tikuèxüügü ya Tupana ya Nanatü ya tórü Cori ya Ngechuchu ya Cristu. Erü nüma nixī ya Tanatü ya nüxŭ ingechaŭtümüügücü rü tórü Tupana ya guxŭguma tūxŭ taãxēēcü. ⁴ Rü nüma ya Tupana rü toxŭ nataãxēē i ngēxguma ngúxŭ tingexgu, na toma rü ta tanataãxēēgūxŭcèx i ngēma togü i duŭxŭgü i ngúxŭ ingegūxŭ. Rü ngēmaãcü ngēma Tupana toxŭ na taãxēēxŭrüü toma rü ta tanataãxēēgü i ngēma togü i duŭxŭgü. ⁵ Rü ñuxma na Cristurŭŭ poraãcü ngúxŭ tingegūxŭ, rü ngēxgumarŭŭ

nūmatama poraācū toxū nataāēxēē. ⁶ Rū ngēmacèx, ngēxguma toma ngúxū tingegūgu, rū ngēmaācū toxū nangupetū na pema rū pexū nangēxmaxūcèx i perū taāē rū perū maxū i taguma gúxū. Rū ngēxguma Tupana toxū taāēxēēgu, rū ngēmaācū tomaā nanaxū na pema rū ta pexū nangēxmaxūcèx i perū taāē rū yaxna namaā pexīnūēxūcèx i ngēxguma ngēmatama ngúxū i toma tingegūxū pexū ngēxmagu. ⁷ Toma rū aixcūma tayaxōgū na pema rū tagutāma ípenatáxū i Tupanaārū ore. Erū nūxū tacuèx rū ngēma na toxrūū ngúxū pingegūxū, rū ngēxgumarūū tá ta toxrūū pexū nangēxma i ngēma taāē i Tupanawa ne ūxū. ⁸ Pa Chaueneēgūx, tanaxwèxe i nūxū pecuèx na ñuxre ga guxchaxūgū toxū ngupetūxū ga Áchiaanewa. Rū yema na poraācū toxū naguxchaxū, rū dūxwa marū tama namaā taporae, rū nagu tarūxīnūē na marū tāūtāma tamaxēxū. ⁹ Rū nagu tarūxīnūē rū ñoma yuwa taxīxūrūū tixīgū. Natūrū yemaācū toxū naxūpetū, erū Tupana ya yuexūxū írūdagūxēēcū toxū nangúexēēchaū na nūxīcatama nūxū nangēxmaxū i pora na yuwa toxū ínanguxūxēēxūcèx, rū taxucūrūwama togūtama na ítanguxūxēēxū. ¹⁰ Rū Tupana rū toxū ínanguxūxēē nawa ga yema guxchaxū ga yuwa toxū gagūchaūxū. Rū ngēxgumarūū tá ta toxū ínanguxūxēē nawa i ñāā taxū i guxchaxū i ñuxma toxū ngēxmaxū. Rū aixcūma tayaxōgū na nūma rū guxūgutāma ngēmaācū toxū nangūxēēxū. ¹¹ Natūrū tanaxwèxe i pema rū perū yumūxēēmaā toxū perūngūxēē. Rū ngēxguma chi ngēmaācū penaxūxgux, rū muxūma

i duūxūgū rū tá Tupanana moxē naxāgū naxcèx i ngēma na ñuxācū toxū nangūxēēxū.

Tūxcūū tama Corītiuwa naxū ga Pauru

¹² Nangēxma i tacū i toxū taāēxēēxū. Rū ngēma nixī na toōēwa nūxū tacuáxū na ñoma i naānewa rū aixcūma Tupana naxwèxexūācūma meā tamaxēxū. Rū pepēxewa nixī ga guxūārū yexera yemaācū tamaxēxū. Natūrū tama togagu nixī ga yema, yerū Tupana ya tomaā mecūmacū nixī ga toxū rüngūxēēcū na yemaācū pepēxewa tamaxēxūcèx. ¹³⁻¹⁴ Rū yema poperagū ga pexcèx taxūmatūxūwa, rū nataxuma ga tacū ga icúxū. Natūrū yema toma tamaxēxūācūma nixī ga pexcèx tanaxūmatūxū na yemawa meā nūxū pecuáxūcèx na ñuxācū tixīgūxū. Rū woo i ñuxma rū tama aixcūma meā toxū na pecuáxū, natūrū chanaxwèxe i wūxi i ngunexūgu rū aixcūma meā toxū pecuèx. Rū ngēxguma meā toxū pecuèxgu rū pema rū tá tomaā petaāēgū i ngēxguma ínanguxgu ya tórū Cori ya Ngechuchu, rū ngēxgumarūū i toma rū tá ta pemaā tataāēgū. ¹⁵⁻¹⁶ Rū yemagu charūxīnūxūcèx nixī ga noxri ga pexūtawa na chaxūxchaūxū na pexū íchayadauxūcèx rū yemaācū pexū na charūngūxēēxūcèx. Rū nagu charūxīnū ga Machedóniāānewa chaxūxgu na pexūtagu íchidauxū, rū yexguma Machedóniāānewa ne chaxūxgu rū wenaxārū pexūtagu íchidauxū. Rū yemaācū chanaxūxchaū, yerū nagu charūxīnū na yemawena choxū perūngūxēēxū na Yudéaanewa chaxūxūcèx. ¹⁷ Bexmana pema nagu perūxīnūēgu rū tama aixcūma chayanguxēēgaācūma nagu charūxīnū ga yema pexūtawa na chaxūegaxū.

¿Éxna pema nagu perüxĩnüëgu rü ñoma wüxi i duüxü i tama Tupanaãxü yaxõxürüüãcüma chamaxü, rü “Ngü” ñacharügüchirëx woo tama chayanguxëëgagu i ngëma nüxü chixuxü? ¹⁸ Natürü Tupana toxü nacuèx na aixcüma yïxü i ngëma torü ore ega pemaã itaxunetagu. ¹⁹ Erü yima Ngechuchu ya Cristu ya Tupana Nane ga guma Chiribánu rü Timutéu rü choma pemaã nüxü tixuchigacü, rü ore i aixcüma ixixüxüxicatama nixu. Rü nüma rü aixcüma nayanguxëë i ngëma nüxü yaxuxü. ²⁰ Rü Cristu nixi ya yima yanguxëëcü ga guxüma ga yema unetagu ga Tupana nuxcümaxüchi nüxü ixuxü. Rü ngëmacèx ngëxguma Ngechuchuégagu Tupanaxü icuèxüügügu, rü ñatarügügu:

“Rü aixcüma nixi i ngëma”, ñatarügügu. ²¹ Rü ñuxma na Cristuarü duüxügü ixigüxü, rü Tupana nixi ya toxü poraexëëcü rü pexü poraexëëcü na taguma Cristuna ixigachixüçèx. Rü nümatama nixi ga tüxü nadexü na noxrü ixigüxüçèx. ²² Rü nüma ya Tupana rü naega tagu naxü erü tórü yora nixi. Rü nüma rü tüxna nanamu i Naãë i Üünexü na wüxi i tórü cuèxruü yïxüçèx, rü ngëmawa nüxü icuáxüçèx na yixcüra tá tüxna naxããxü i muxüma i to i mexügu. ²³ Pema nüxü pecuèx ga noxri rü Corïtiuwa chaxüxchaü, natürü tama yéma petanüwa chaxü yerü tama chanaxwèxe na pexü changechaügüxëëxü. Rü yemacèx tama pexütawa íchayadau, yerü tama pexü chingagüchaü. Rü Tupana nüxü nacuèx na aixcüma na yïxü ga yema. ²⁴ Rü tama tanaxwèxe na pexü tamuxü na ñuxãcü tá Tupanaãxü peyaxögüxü. Erü pema rü marü aixcüma meãma peyaxögü. Natürü ngëma

tanaxwèxexũ nixĩ na pexũ tarüngũxèẽgũxũ na yexeraãcü petaãẽgũxũcèx.

2

¹ Rũ yemacèx nixĩ ga tama wena pexũtawa chaxũxũ, yerũ tama chanaxwèxe ga pexũ na changechaũxèẽxũ. ² Erũ ngẽxguma chi pexũ changechaũxèẽgu, ¿rũ texé tá choxũ tataãẽxèẽ? ¿Rũ ñuxãcü tá choxũ petaãẽxèẽ, ega pexũ changechaũxèẽgu? ³ Rũ yemacèx nixĩ ga yemaãcü pexcèx popera chaxümatũxũ na penamexèẽgũxũcèx i perũ guxchaxũgũ naxũpa na pexũtawa chaxũxũ. Yerũ tama chanaxwèxe ga yexguma chi yéma chaxũxgu na choxũ pengechaũxèẽxũ. Erũ pema nixĩ i chanaxwèxexũ na choxũ petaãẽxèẽgũxũ. Rũ aixcüma nagu charũxĩnũ rũ ngẽxguma choma chataãẽxgu rũ pema rũ tá ta petaãẽgũ. ⁴ Rũ yexguma pexcèx chanaxümatũgu ga yema popera, rũ poraãcü chanaxixãchiãẽ, rũ düxwa yema chorũ ngechaũmaã chaxaxu. Natürũ tama pexcèx chanaxümatũ na pexũ changechaũxèẽxũcèx, natürũ pexcèx chanaxümatũ na nüxũ pecuáxũcèx na ñuxãcü poraãcü pexũ changechaũxũ.

Pauru rũ nüxũ nüxũ nangechaũ ga yema duũxũ ga chixexũ namaã üxũ

⁵ Rũ yema yatũ ga choxũ ngechaũxèẽxũ, rũ tama choxũxĩcatama nixĩ ga nangechaũxèẽxũ, natürũ pexũ rũ ta nangechaũxèẽ. Natürũ tama chanan-gupetũxèẽchaxũ na pexna chacaxũ i ngemachiga.. ⁶ Rũ yema poxcu ga nüxna pexãxũ ga yema duũxũ ga yexguma pengutaquẽxegũgu, rũ chauxcèx rũ

marū name na ngēxīcatama na yīxū. ⁷ Rū ngēmacèx i ñuxma rü chanaxwèxe i nüxū nüxū pengechaū i norū chixexū rü nüxū perüngūxēē na tama yexeraxū i chixexūwa nagaāxūcèx i ngēma norū ngechaū. ⁸ Rū ngēmacèx chanaxwèxe i wenaxārū noxrirūū nüxū nüxū pedauxēē na aixcūma nüxū pengechaūxū. ⁹ Rū yemacèx nixī ga yemachiga marū pexcèx chanaxūmatūxū, yerū pexū chaxūxchaū, rü nüxū chacuáxchaū ngoxi marū aixcūma chauga pexīnūē. ¹⁰ Rū ñuxma pemaā nüxū chixu rü yíxema pema tūxū nüxū pengechaūxē i tūmaārū chixexū, rü choma rü tá ta tūxū nüxū changechaū. Rū ngēxguma chi tacū rü chixexūxū tūxū changechaūgu, rü pegagu nixī i Cristupēxewa tūxū nüxū changechaūxū i ngēma. ¹¹ Rū ngēmaācū chanaxū na tama nayoxniēxūcèx i Chataná na chixexūgu tūxū nayixēēxūcèx. Erū yixema rü meāma nüxū tacuèx i nacūma i Chataná na ñuxācū chixexūgu tūxū nayixēēchaūxū.

Tróaarū ñānewa rü nanaxixāchiāē ga Pauru

¹² Rū yexguma Tróaarū ñānewa changuxgu na nüxū chixuxūcèx ga Cristuarū ore, rü poraācū choxū natauxcha na yéma tórū Coriaxū chapuracūxū. ¹³ Natūrū tama aixcūma chataāē ga yéma, yerū tama yexma nüxū chayangau ga taeneē ga Titu. Rū yemacèx nüxū charūmoxē ga yemacūāx ga duūxūgū, rü ichaxūāchi, rü Machedóniāānewa chaxū.

Cristu rü Paurumaā napora

¹⁴ Rū Tupanana moxē taxāgū erū norū duūxūgūxū toxū nixīgūxēē. Rū ñuxma na Cristuarū duūxūgū tixīgūxū, rü nūma ya Tupana

rü guxŭguma tomaã nanaxŭpẽxe. Rü nüma nixĩ i toxŭ namuxŭ na duŭxŭgŭxŭ nüxŭ tacuèxèxŭcèx i norü ore. Rü ngẽma norü ore rü guxŭwama nangu rü guxŭguma nipuema ñoma wüxi i pumara i yixichixŭrüü. ¹⁵ Rü ñuxma i toma i Cristugagu Tupanapẽxewa na timexŭ, rü guxŭwama tanguchigagü natanüwa i ngema yaxŭgŭxŭ rü ngema tama yaxŭgŭxŭ. ¹⁶ Rü ngẽma duŭxŭgŭ i tama yaxŭgŭxŭ rü nüxŭ nawèxtümŭxŭ i tochiga, erü ngema ore i nüxŭ tixuxŭ rü norü poxcuchigaxŭ namaã nixu. Natürü ngẽma yaxŭgŭxŭ rü namaã nataxègü i tochiga erü ngema ore i nüxŭ tixuxŭ rü ore i namaxèxèxŭ nixĩ. Rü ngẽmacèx çtexéãxŭ natauxcha i ñaã puracü na nüxŭ tixuxŭ i ngẽma ore? ¹⁷ Rü yixema toxrüü ixigŭxexicatama tixĩ ya tüxŭ natauxchaxe. Rü toma rü tama Tupanaãrü oregu díeru ngixŭ tayaxu ngẽma togü naxŭgŭxŭrüü. Natürü Tupanapẽxewa rü aixcüma meã nüxŭ tixu i ngẽma norü ore, erü nüma toxŭ nimugü rü Cristuarü tixigü.

3

Tupanaãrü uneta i ngexwacaxŭxŭchiga

¹ Rü ñuxma na pemaã nüxŭ tixuxŭ na aixcüma Tupana yixŭ ga toxŭ mucü, rü bexmana tá nagu perüxñnüë na wenaxãrü togüétüwa tidexagŭxŭ. Çxna penaxwèxe na wüxi i carta i cuèxruŭ pexŭ tawéxŭ na nawa nüxŭ pecuáxŭcèx na aixcüma Tupanaãrü orearü uruŭgü tixigŭxŭ, rü èxna penaxwèxe na pexütawa naxcèx itaçaxŭ i cartagü na ngẽmawa duŭxŭgŭ toxŭ cuáxŭcèx naxrüxŭ i ngema togü? ² Rü pemaã nüxŭ tixu rü tama

tanaxwèxe i tacü rü carta na duüxügü toxü cuáxúcèx, erü pematama nixĩ i ngēma cartarüü pixĩgüxü, rü pewa nixĩ i nangóxü na aixcüma Tupana yĩxü ga toxü mucü. Rü meāma toðewa nüxü tacuèx i ngēma. Rü yema na naxüchicüüxü ga perü maxü, rü ngēmawa guxüma i duüxügü nüxü nadau na aixcüma wüxi ga mexü ga puracü taxüxü ga petanüwa. ³ Rü ñuxma rü meāma nangox na pema rü ñoma wüxi i carta i Cristutama ümatüxürüü na pixĩgüxü. Rü torü puracügagu nixĩ i ngēma. Natürü tama wüxi i carta i tacü rü ümatüxümaã ümatüxü pixĩgü, natürü pema nixĩ i carta i Tupana ya Maxücüãe i Üünexü ümatüxü. Rü ngēma carta rü tama popera rü èxna nutawa iwücuchixü nixĩ, natürü perü maxüwa nixĩ i nangóxü i ngēma. ⁴ Rü ngēmacèx tama tamuñe na ngēmaãcü togücèxtama tidexagüxü, erü tayaxögü na Cristugagu Tupana toxü dauxü na timexü. ⁵ Rü tama toxrütama cuèxmaã nixĩ i tanaxüxü i tacü rü mexü. Natürü guxüma i ngēma taxüxü rü Tupanaärü ngüxēemaã nixĩ i tanaxüxü. ⁶ Rü Tupana rü toxü narüngüxēe na duüxügümaã nüxü tixuxü i ngēma ngexwacaxüxü i norü uneta na ñuxäcü Cristugagu tá tüxna naxããxü i maxü i taguma gúxü. Rü ngēma maxü rü tama yema mugü ga Moïché ümatüxügagu tanayaxu, natürü tanayaxu erü Tupanaãe i Üünexü tüxna nanaxã. Rü yema mugü ga Moïché ümatüxü rü yuwa tüxü nagagü, natürü Tupanaãe i Üünexü rü tüxna nanaxã i maxü i taguma gúxü. ⁷ Rü yema mugü ga Moïchéna naxãxü ga Tupana, rü nutagu nixĩ ga naxümatüxü. Rü yexguma

Moïché nayauᵗᵗgu ga yema mugü, rü poraãcü niyaurachiwecüxü. Rü yemacèx ga duᵗᵗgü rü taxucürüwama Moïchéchiwegu narüdaunü. Natürü yema norü yaurachiwecüü rü nixochigü. Natürü ga yema mugü ga Moïché tüxna āxü i yuwa tüxü gagüxü, rü taxü ga yauracüüxümaã ínangu. Rü yemaãcü namexêchi ga yexguma ínanguxgu. ⁸ Natürü yexeraãcü namexêchi nixí i ngêma uneta i ngexwacaxüxü i Tupanaãê i Ünexü taxcèx ngoxêxü. ⁹ Rü yemaãcü woo namexêchi ga yema mugü ga yuwa tüxü gagüxü, natürü yexeraãcü namexêchi i ngêma uneta i ngexwacaxüxü i Tupanapêxewa tüxü mexêxü. ¹⁰ Rü yema mugü ga noxri mexêchixü, rü ñuxma rü taxuwama name, ega namaã nügü nangugügu i ngêma Tupanaãrü uneta i ngexwacaxüxü i yexeraãcü mexêchixü. ¹¹ Rü yemaãcü woo namexêchi ga yema mugü ga paxaãchi ixixü, natürü yexeraãcü namexêchi i ngêma uneta i ngexwacaxüxü i guxügutáma ixixü. ¹² Rü toma aixcüma nüxü tacuèx na guxügutáma yiixü i ngêma Tupanaãrü uneta i ngexwacaxüxü i mexêchixü, rü ngêmacèx tama cúãcüma duᵗᵗgümaã nüxü tixu. ¹³ Rü ngêmacèx tama duᵗᵗgüchaxwa iticuxgü yema Moïché üxürüü. Yerü ga Moïché rü nügü nidüxchiwe na tama nüxü nadaugüxcèx ga yema Yudíugü ga ñuxãcü na yaxochigüxü ga norü yaurachiwecüü. ¹⁴ Natürü ga yema duᵗᵗgü ga Moïchéxü íixümücügüxü rü ñoma yadüxgüchiwexürüü nixígü yerü tama nüxü nacuèxgüéga ga řacüchiga na yiixü ga yema mugü. Rü ñuxma rü ta i ngêma Yudíugü rü tama nüxü nacuèxgüéga i

ngëxguma nawa nangúegu i ngëma mugü. Erü nangëxma i tacü i ñoma yadüxgüchiwexürüü nüxü naguxchaxëëxü na tama nüxü nacuëxgüxcèx. Rü ñuxma rü ta tama nüxna ínanguéga i ngëma nacüma erü Cristuxicatama nixí ya yima nüxna ínanguxëëcü. ¹⁵ Rü ñuxma rü ta i ngëma Yudíugü, rü ngëxguma nawa nangúegu i ngëma ore ga Moíché tüxna äxü, rü nangëxma i tacü i ñoma yadüxgüchiwexürüü nüxü naguxchaxëëxü na tama nüxü nacuëxgüégaxüxcèx na tacüchiga yíxü i ngëma ore. ¹⁶ Natürü ngëxguma wüxi i duüxü nüxü rüxoxgu i nacüma i chixexü, rü tórü Coriaxü yaxõõgu, rü ngëxguma nixí i nüxna ínanguxü i ngëma nüxü naguxchaxëëxü. ¹⁷ Erü nüma ya tórü Cori rü Naãe i Üünexü rü wüxitama nixí rü ngextá ínangëxmaxüwa i tórü Coriãe i Üünexü, rü tüxü nanatauxchaxëë na Tupanana ingaicamagüxü. ¹⁸ Rü ngëmacèx guxãma i yixema na Cristuaxü yaxõgüxü rü ñoma wüxi i woruarüü tawa nangóchipeta na ñuxãcü namexëchixü ya tórü Cori erü nataxuma i tacü i tüxü idüxüxü naxchaxwa. Rü nüma ya tórü Cori i Naãe i Üünexü ixícü, rü guxüguma yexeraãcü tüxü nimexëëchigü na naxrüü aixcüma imexüxcèx.

4

¹ Rü ngëmacèx taguma nüxü tarüchau i ñaã puracü, erü Tupana ya nüxü tangechaütümüücü nixí ga toxü mucü na tanaxüxcèx i ñaã puracü na duüxügümaã nüxü tixuxüxcèx i norü ore. ² Rü yemacèx nüxü tarüxoe ga guxüma ga tacü ga chixexü i ãne tüxna äxü i cúãcü üxü. Rü

tama tanawomüxēēcūma nixī i namaã nüxū tixuxū i ore rü tama tanaxüchicüü i ngēma ore. Natürü ngēma ore i aixcūma ixīxūxīcatama nixī i nüxū tixuxū. Rü ngēmaãcū Tupanapēxewa tamaxē rü duūxügüpēxewa togū itawēx na nüxū nacuēxgüxüçèx na ñuxãcū tixīgüxū i tomax. ³ Rü ngēxguma chi texécèx naguxchagu i ngēma ore i mexū i nüxū tixuxū, rü ngēma duūxügü i iyarütauxexüçèxīcatama nixī i naguxchaxū. ⁴ Erü nümagü rü tama nayaxögü. Rü ngēmacèx i ñoma i naãneãrū āēxgacü i Chataná rü nüxū nanaguxchaxēē na tama nüxū nacuēxgüxüçèx na ñuxãcū namexēchixū i norü ore ya Cristu ya Üüncü. Rü Cristuwa nixī i nangóxū na ñuxãcū na yīxū ya Tupana. ⁵ Rü ngēxguma duūxügümaã nüxū tixuxgu i ngēma ore, rü tama tochigaxütama tixugü. Natürü nüxū tixu na Ngechuchu ya Cristu rü tórü Cori yīxū, rü nüma tüxū na nangechaüxügagu perü ngüxēēruügü na tixīgüxū. ⁶ Erü nümatama ya Tupana ga noxri naãne naxüxgux rü ēānexüwa nangoxēēcü ga ngóonexū, rü nümatama nixī i ñuxma i tüxū yangoxnaãēxēēgüxū na ngēmawa nüxū icuáxüçèx na ñuxãcū namexēchixū i nümax. Rü ngēma norü mexū rü Ngechuchu ya Cristuchi-wewa nixī i nüxū idauxū.

Tayaxōgüama ega woo ngúxū ingegügu

⁷ Rü ngēma nüxū na icuáxū na ñuxãcū namexēchixū ya Tupana, rü ngēma cuèx rü wüxi i mexēchixū nixī. Natürü ngēma cuèx i mexēchixū rü taxüne i maīraxūnaxcèxwa nangēxma, na nangóxüçèx na Tupanawa ne naxūxū i guxūma i pora rü tama i tawatama. ⁸ Rü guxūwama

toxū nangēxma i guxchaxūgū, natūrū taguma nūxū tarūchau i ñaã puracū. Rū woo poraãcū taxoegaãēgūgu, natūrū taguma ítanangēx. ⁹ Rū woo togū towe ingēxūtanūgu, natūrū ya Tupana rū taguma toxū ínawogū. Rū woo duūxūgū toxū napíexēēgu, natūrū tama ngēxma tayacuèxēē i ñaã puracū. ¹⁰ Rū guxūwama i ngextá ítaxīxūwa rū āūcūmaxūwa tangēxmagū, yexgumarūū ga Ngechuchu na āūcūmaxūwa nayexmaxūrūū. Natūrū ngēmaãcū toxū naxūpetū na duūxūgū nūxū daugūxūcèx na ñuxācū towa namaxūxū ya Ngechuchu. ¹¹ Rū ñuxma na tamaxēxū, rū guxū i ngunexūgu rū Ngechuchugagu āūcūmaxūwa tangēxmagū. Natūrū ngēmaãcū toxū naxūpetū na Ngechuchu inawéxūcèx i norū pora nawa i ñaã toxone i yuxwèxexū. ¹² Rū ngēmaãcū Tupanaārū orecèx āūcūmaxūwa tangēxmagū, natūrū ngēmaãcū toxū naxūpetū na pema rū pexū nangēxmaxūcèx i maxū i taguma gúxū. ¹³ Tupanaārū ore i ūmatūxūwa rū ñanagūrū: “Nūxū chayaxō rū yemacèx Tupanachiga chidexa”, ñanagūrū. Rū ngēxgumarūūtama tixīgū i toma na tayaxōgūxū rū Tupanachiga tidexagūxū. ¹⁴ Erū nūxū tacuèxgū rū Tupana ga yuwa ínadaxēēcū ga Ngechuchu ya tórū Cori, rū yimatama Tupana tá nixī ya toxū írūdagūxēēcū, erū Ngechuchuarū duūxūgū tixīgū. Rū ngēmaãcū wūxigu pemaã nūgūxūtawa tá toxū nagagū. ¹⁵ Rū guxūma ga yema toxū ngupetūxū rū perū mexūcèx nixī na yexeraãcū yamuētanūxūcèx i ngēma duūxūgū i Tupana nūxū rüngūxēēgūxū. Rū ngēmaãcū tá dūxwa namuxūchi i ngēma duūxūgū i moxē Tupanana

ãgũxũ rü nüxũ icuèxüügũxũ. ¹⁶ Rü ngẽmacèx taguma nüxũ tarüxoe na nüxũ tixuxũ i ngẽma ore. Rü woo yayachigügu rü yaturachigügu i toxone, natürü toõewa rü guxũ i ngunexũgu rü yexeraãcü tiporaetanü. ¹⁷ Erü ngẽma ngúxũ i toxũ üpetũxũ i ñãã torü maxũwa, rü ngẽma rü wüxi i paxaãchimare nixĩ rü paxa tá nangupetü. Natürü ngẽmaãcü tá tanayaxu i wüxi i maxũ i mexẽchixũ i tagutáma gúxũ i ñoma i naãneçũãx i maxũârü yexeraxüchi ixĩxũ. ¹⁸ Rü tama ngẽma ñuxma nüxũ idauxũgu nixĩ itarüxĩnũèxũ, natürü nagu tarüxĩnüè i ngẽma ñuxma tama nüxũ idauxũ. Erü ngẽma ñuxma nüxũ idauxũ rü tama natai, natürü ngẽma ñuxma tama nüxũ idauxũ, rü guxũgutáma nangẽxmaẽcha.

5

¹ Rü nüxũ tacuèxgü ega ngẽxguma iyanaxoxgu i ñãã toxone i paxaãchi ñuxma toxũ ngẽxmaxũ, rü daxũguxũ i naãnewa tá tanayaxu i wüxi i toxone i tagutáma iyarüxoxũ i Tupanatama toxcèx mexẽèxũ rü tama i duũxügü. ² Rü ngẽmacèx i ñuxma i ñãã toxonewa tamaxẽyane, rü tama aixcüma tataãègü. Erü tanaxwèxe na paxa toxũ nangẽxmaxũ i ngẽma toxone i daxũguxũ i naãnewa ngẽxmaxũ. ³ Rü ngẽma toxone i daxũguxũ i naãnewa tá toxũ ngẽxmaxũ rü ñoma wüxi i naxchirurũ tá toxũ nidüxü, na ngẽmaãcü naxãxũnexüçèx i toõè. ⁴ Rü ñãã toxone i ñuxma toxũ ngẽxmaxũwa tamaxẽyane, rü tanaxixãchiãègü rü tama aixcüma tataãègü. Rü tama aixcüma ítanatáxchaũ i toxone i ñoma i naãnewa toxũ ngẽxmaxũ, natürü

tanaxwèxegü na tanayaxuxü i toxone i ngexwacaxüxü na ngēmaācū ngēma maxü i ngexwacaxüxü iyanaxoxēēxüçèx i toxone i ñuxma toxü ngēxmaxü. ⁵ Rū Tupana nixī ya toxü imexēcū naxcèx i ngēma ngexwacaxüxü i maxü rü ngēma ngexwacaxüxü i toxone. Rū toxna nanamu ga Naā i Üünexü na ngēmawa nüxü tacuáxüçèx na aixcūma tá tanayaxuxü i ngēma. ⁶ Rū ngēmacèx taxucèxma taxoegaāēgü. Erü nüxü tacuèx rü ñuxma ñāā toxonewa tamaxēyane, rü taxucürüwama tórü Corixütawa tangēxmagü i daxüguxü i naānawa. ⁷ Rū woo tama nüxü tadaugügu ya yima tórü Cori i ñuxmax, natürü tayaxōgü na wüxi i ngunexü rü tá nüxü tadaugüxü. Rū ngēma nixī i toxü poraxēēxü i ñāā torü maxüwa. ⁸ Rū ngēmacèx taxucèxma taxoegaāēgü ega tayuegu. Erü toxcèx rü narümemaē nixī na nüxna ítachoxüxü i ñāā toxone, na tórü Corixütawa tayangēxmagüxüçèx. ⁹ Rū ngēmacèx, woo ñoma i toxonewa tangēxmagügu rü ēxna tama nawa tangēxmagügu, rü tanaxwèxe na guxüguma tórü Coriarü ngúchaü na taxüxü. Rū ngēmacèx naxcèx tadaugü na tanaxüxü i ngēma nanaxwèxexü i nümax. ¹⁰ Erü guxātama i yixema rü Cristupēxewa tá tangugü na wüxichigü nayaxüçèx i ngēma tüxna üxü. Rū nüma tá wüxichigüxü nangugüarü maxüāx. Rū ngēxgumarüü na ñuxācū meā imaxēxü rü ēxna chixri imaxēxü ga yexguma ñoma ga taxünewa iyexmagügu, rü ngēmaācū tá tüxna nanaxā ya wüxichigü.

Cristu rü taxcèx Tupanaxü narüngüxmüxēē

¹¹ Rū ngēmacèx Tupanaärü orearü uwa tapuracüe rü tayaxucüxēgü i duüxügü na

yaxōgüãxúcèx. Erü toma rü aixcüma torü Corixü tamuüē. Rü Tupana toxü nacuèx na ñuxãcü yĩxü i tórü maxü, rü chierüna pema rü chi ta toxü pecuèxgux. ¹² Rü tama tanaxwèxe i wenaxârü togüétüwa tidexagü, natürü pexü tarüngüxēēchaü na pexü nangëxmaxücèx na tacücèx tomaã petaãëgüxü na nüxü pecuáxúcèx na ñuxãcü penangãxüxü i ngëma duüxügü i pepëxewa nügü írümegünetaxü natürü norü maxüwa rü tama ixaixcümagüxü. ¹³ Rü woo duüxügü toxü daugügu na Tupanagu taxãüãëgüxü, rü nüetama nixĩ i ngëma erü nümatama ya Tupana rü meãma toxü nacuèx. Natürü i pema rü meãma toxü pecuèx na meãma toðëxü tacuáãcüma pemaã nüxü tixuxü ga norü ore. ¹⁴ Rü Cristu ya poraãcü toxü ngechaücü nixĩ ya ñuxma tomaã icuácü, erü tayaxō na nüma rü guxãârü pecaducèx nayuxü na yexma yanaxoxúcèx ga guxãârü chixexügü. ¹⁵ Rü yemaãcü guxüma ga duüxügücèx nayu ga Cristu, na ngëma duüxügü i ñuxma maxëxü, rü tama nümatama nagu naxĩnüëxügu namaxëxúcèx, natürü naxcèx na namaxëxúcèx ya yima naxcèx yucü rü wena írüdacü. ¹⁶ Rü ngëmacèx i toma rü tama ñoma i naãnecüãx i duüxügü nagu rüxĩnüëxürüü texéxü tangugüarü maxüãx. Rü woo ga üpa rü ñoma ga naãnecüãx ga duüxügü nagu rüxĩnüëxürüü Cristuxü tangugü, natürü i ñuxma rü tama ngëmaãcü namaã nagu tarüxĩnüë. ¹⁷ Rü ngëxguma texé Cristuaxü yaxōxgu, rü ngexwacaxüxü i duüxü tixĩ. Rü nuxcümaüxü ga tümacüma rü marü tüxna inayarüxo, rü ngexwacaxüxü i maxü tüxü nangëxma. ¹⁸ Rü

guxūma i ngēma rü Tupana nixī ya naxücü. Rü nüma nixī ga Cristugagu tamaã inangüxmüxū. Rü ñuxma rü toxū namu na duūxügümaã nüxū tixuxū na namaã inangüxmüëxüçèx. ¹⁹ Yerü Tupana rü Cristugagu duūxügümaã nügü narüngüxmüxëë. Rü tama duūxügüarü pecadugu naxīnūãcüma nanaxü ga yema. Rü ñuxma rü toxū namu na ngēmachigaxū duūxügümaã tixuxū. ²⁰ Rü ngēmaãcü Cristuarü orearü ngeruūgü tixīgü, rü towa nixī i Tupana pexū cèèxüxū na namaã iperüngüxmüëxüçèx. Rü ngēmacèx Cristuégagu pexū tacèèxügü na Tupanamaã iperüngüxmüëxüçèx. ²¹ Cristu rü taguma pecadu naxü. Natürü tagagu nixī ga Tupana ga ñoma pecaduãxürüüãcüma namaã naxüãxū na yemaãcü nagagu tüxū ínanguxüxëëxüçèx nawa i tórü chixexū na aixcüma napëxewa imexüçèx.

6

¹ Rü ñuxma na Tupanaãrü ngüxëëruū tixīgüxū, rü pexū tacèèxū na tama nüxū pexoexüçèx ga yema pemaã na namecümaxū ga yexguma nayuxgu ga Nane. ² Erü Tupana rü norü ore i ümatüxüwa, rü ñanagürü: “Rü yema ngunexū ga nagu namexügu na choxū peyaxuxū, rü yexguma nixī ga pexū chaxīnüxū. Rü yexguma pexna chanaxuãxügu ga maxū i taguma gúxū, rü yexguma nixī ga pexū charüngüxëëxū”, ñanagürü. Rü ñuxma nixī i ngēma ngunexū i nagu namexū na Tupanaxū peyaxuxū, rü ñuxma nixī i ngēma ngunexū i pexna naxuaxüãxū i maxū i taguma gúxū. ³ Rü toma rü guxüguma

naxcèx tadau na guxpèxewa meã tamaxèxü na taxucèxma texé chixri torü puracüchiga idexaxücèx. ⁴⁻⁵ Rü guxüwama duüxügüxü nüxü tadauxëëchaü na aixcüma Tupanaârü duüxügü tixügüxü. Rü ngëmacèx yaxna namaã taxïnüë i ngëxguma woo ngüxü toxü ngupetügu, rü êxna tacü toxü tauxgu, rü êxna tacü rü guxchaxü toxü ngëxmagu, rü êxna toxü yaçuaixgügu, rü êxna toxü napoxcuegu, rü êxna naxixächiaëtanügu rü tomaã nanuëgu. Rü poraäcüxüchima tapuracüe, rü ñuxguacü rü tama tapee, rü ñuxguacü rü taiya toxü nangux. Natürü yaxna namaã taxïnüë i guxüma i ngëma. ⁶ Rü ngexgumarüxü ta duüxügüxü nüxü tadauxëë na aixcüma namexü i torü maxü, erü aixcüma Tupanapèxewa meã tamaxë, rü meã Tupanaxü tacuèx, rü yaxna duüxügümaã taxïnüë, rü namaã tamedcüma. Rü nüxü nüxü tadauxëë na towa nangëxmaxü i Tupanaãë i Ünexü rü aixcüma guxü i duüxügüxü tangechaüxü. ⁷ Rü duüxügüxü nüxü tadauxëë na aixcüma namexü i torü maxü, erü namaã nüxü tixu i ngëma ore i aixcüma ixixü, rü itanawëx i Tupanaârü pora i towa ngëxmaxü. Rü ngëma toxne ixixü rü ngëma nixi i torü maxü i aixcüma mexü i Tupanapèxewa. Rü ngëmamaã nixi i togü ítapoxüxü i torü uwanügüpèxewa. ⁸ Rü ñuxguacü i duüxügü rü toxü nicuëxüügü, rü ñuxguacü rü tacü tomaã nixugüe. Rü ñuxguacü rü meã tochiga nidexagü, rü ñuxguacü rü chixri tochiga nidexagü. Rü woo aixcümachirëx yixigu i ngëma ore i nüxü tixuxü, natürü doratèex toxü nawogüe. ⁹ Rü woo meã toxü nacuëxgüchirëxgu, natürü ñoma tama toxü nacuáürüü tomaã nixigü i duüxügü. Rü

ñuxguacü rü wixgutaèx tayue, natürü naetüwa tamaxëãma. Rü toxü napoxcue, natürü tama toxü nadaixichi. ¹⁰ Rü woo tangechaügügu, natürü guxüguma tataãëgüama. Rü woo ñoma i naãnewa tama tamuãrü ngëmaxüãxgügu, natürü muxüma i duüxüna tanaxã i taxü i mexü erü togagu nanayaxu i maxü i taguma gúxü. Rü woo taxuüma toxü ngëxmèxgu i ñoma i naãnewa, natürü daxü-guxü i naãnewa rü toxü nangëxma i guxüma. ¹¹ Pa Chaueneëgü i CorĭtiucüĀx, dücax aixcüma pemaã nüxü tixu rü guxü i torü maxünemaã pexü tangechaügüxüchi. ¹² Rü toma rü tama pexü taxoe, natürü pema waxi nixĩ i tama petoxwèxexü. ¹³ Rü dücax, Pa Chaueneëgüx, rü ñoma wüxi i papá naxãcügüxü cèèxüxürüü pexü chacèèxü na choxü pengechaügüxücèx ngëma choma pexü changechaüxürüü.

Tupana ya maxücüpata tixĩgü

¹⁴ ¿Rü tãütáma namaã pexãmücü i ngëma duüxügü i tama yaxõgüxü! Erü ngëxguma chi ngëmaãcü penaxüxgu rü tãütáma guxã wüxigu perüxĩnüë. ¿Rü ñuxãcü nawüxiguxü i ngëma mexü namaã i ngëma chixexü? ¿Rü ñuxãcü nawüxigu i ngóonexü namaã i ëãnexü? ¹⁵ ¿Rü ñuxãcü nawüxiguxü ya Cristu namaã i Chataná? ¿Rü ñuxãcü nawüxiguxü i wüxi i duüxü i yaxõxü namaã i wüxi i duüxü i tama yaxõxü? ¹⁶ ¿Rü ñuxãcü Tupanapatawa nangëxmaxü i tupananetachicünèxãgü? Erü yixema rü Tupana ya maxücüpata tixĩgü, rü tawa namaxü i nümax. Rü Tupana rü pechiga nidexa ga yexguma ñaxgu:

“Rü ngēma duūxūgūwa tá chamaxū, rü natanūgu tá chayarūxūxū. Rü norū Tupana tá chixī, rü nūmagū rü tá chorū duūxūgū nixīgū”, ñaxgu. ¹⁷ Rü yemacèx ñanagürü ta ga tórü Cori: “¡Rü ípechoxū i natanūwa i ngēma duūxūgū i tama chorū duūxūgū ixīgūxū! ¡Rü tāxū i nūxū pingōgūxū i ngēma chopēxewa chixexū! Rü choma rü tá pexū chayaxu. ¹⁸ Rü choma rü Penatū tá chixī, rü pemagū rü tá chaunegū rü chauxacūgū pixīgū”, ñanagürü ya tórü Cori ya Tupana ya guxūārü yexera poraxūchicū.

7

¹ Rü dücax, Pa Chaueneēgū ya Pexū Changechaūgūxex, rü ngēma Tupanaārū unetagū i pemaã nūxū chixuxū, rü taxcèx nixīgū. Rü ngēmacèx tanaxwèxe na yigūna idaugūxū na tama taxūnemaã rü ēxna taãemaã naxūxūcèx i ngēma Tupanapēxewa tama mexū. Rü tanaxwèxe i aixcūma Tupanaxū imuūēãcūma nūxna yigū taxāgū rü naxcèxicatama tamaxē.

Pauru rü ngema Corītiucūāxgūmaã nataãxē

² Rü tanaxwèxe i toxū pengechaūgū. Rü dücax ga toma rü taxūxemaãma chixexū taxūgū. Rü taxūxexūma chixexūgu tanguxēē. Rü taxūxexūma tawomūxēēgū. ³ Rü tama pexū chixuxūcèx nixī i pemaã nūxū chixuxū i ngēma. Yerū marū pemaã nūxū chixu na ñuxācū guxū ga chorū maxūmaã pexū changechaūxū. Rü ngema pexū na changechaūxūgagu rü íchamemare na petanūwa chamaxūxū rü ēxna wūxigu pemaã chayuxū.

4 Rû ñuxma rû taxucèxma pexũ chaxãneãcũma pemaã chidexa erũ poraãcũ pemaã chataãe. Rû woo ngúxũ na tingegũxũ, natürü aixcũma choxũ penangúchaũxêe rû choxũ petaãexêe. ⁵ Rû yexguma Machedóniããnewa tangugügucürüwa rû taguma itarüngügü. Yerü guxüwama ga ngexta ítaxĩxüwa rû nüxũ itayangau ga guxchaxügü. Rû duũxügü rû toxũ nanaguxchaxêe na tanaxüxũ i Tupanaarü puracü rû yemacèx poraãcũ taxoegaãxêgü.. ⁶ Natürü ya Tupana ya tüxũ taãexêecü ya yíxema ngechaügüxe, rû toxũ rû ta nataãexêe ga yexguma toxütawa nanguxgu ga taenee ga Titu. ⁷ Rû tama yema toxütawa na nanguxücèxicatama tataãegü, natürü tataãegü ta yerü ga pema rû poraãcũ nüxũ penangúchaũxêe rû penataãexêe ga guma taenee ga Titu. Rû nüma ga Titu rû tomaã nüxũ nixu na ñuxãcũ poraãcũ penaxwèxexũ na toxũ pedauxũ. Rû tomaã nüxũ nixu na ñuxãcũ naxcèx pengechaügüxũ ga yema chomaã pexüxũ, rû na ñuxãcũ chauxcèx pexoegaãegüxũ. Rû guxüma ga yema oremaã rû yexeraãcũ chataãe. ⁸ Choma nüxũ chacuèx rû yema popera ga pexcèx chaxümatüxũ rû pexũ nangechaügüxêe, natürü ñuxma rû marü tama naxcèx changechaũ na chanaxümatüxũ ga yema popera. Rû noxri rû yemáãcũ naxcèx changechaũ ga yexguma nüxũ chacuèxgu ga na pexũ nangechaügüxêexũ ga yema popera ga yexguma penayauxgu. ⁹ Natürü i ñuxma rû chataãe na pexcèx chanaxümatüxũ ga yema popera. Rû tama yema na pengechaügüxücèx chataãe, natürü chataãe yerü yema perü ngechaügagu Tupanana pecuèxãchie rû penaxüchicüü ga perü maxũ. Rû

pema rü aixcüma Tupanana pecuèxãchieãcüma namaã peporae ga yema ngechaũ, rü yemaãcü taxuũma ga chixexũ pemaã taxü ga yexguma pexcèx tanaxümatügu ga yema popera. ¹⁰ Rü ngẽma ngechaũ i Tupana naxwèxexũãcüma namaã iporaexũ, rü name nixĩ, erü ngẽma ngechaũgagu naxüchicüü i tórü maxũ rü ngẽmagagu tanayaxu i maxũ i taguma gúxũ. Rü ngẽmacèx taxucèxma naxcèx pixãũxãchie i ngẽma ngechaũ. Natürü ngẽma ngechaũ i ñoma i naãnecũãx i duũxügu nüxũ ngẽxmaxũ rü taxuwama name erü yuwa nanaga. ¹¹ Rü yexguma yema poperamaã pexũ changechaũxẽegu, rü Tupana naxwèxexũãcüma nixĩ ga namaã peporaexũ ga yema ngechaũ. ¡Rü dücax i ñuxma i tacü Tupana pemaã üxũ i ngẽma perü ngechaũgagu! Yerü yema perü ngechaũgagu rü aixcüma nagu perüxĩnüë ga yema chixexũ ga petanüwa üpetüxũ, rü meãma chomaã nüxũ pixu ga yema. Rü yema perü ngechaũgagu rü peãëwa nangux ga yema chixexũ, rü poraãcü Tupanaxũ pemuũë. Rü yemacèx penaxwèxe na yéma chaxũxũ na pexũ chayarüngũxẽëxücèx yerü penamexẽëgüchaũ ga yema chixexũ. Rü yema perü ngechaũgagu rü aixcüma penaxucuxẽ ga yema duũxũ ga chixexũ üxũ. Rü guxũ ga yemawa rü ipenawèx na tama pegagu yiĩxũ ga yema chixexũ ga ngupetüxũ. ¹² Rü yemacèx, yexguma pexcèx chanaxümatügu ga yema popera, rü tama yema duũxũ ga chixexũ üxũgu charüxĩnüãcüma chanaxümatü, rü tama yema duũxũ ga namaã chixexũ naxüxũgu charüxĩnüãcüma chanaxümatü. Natürü chanaxümatü ga yema popera na yemawa Tupanapèxewa nüxna pecuèxãchiexücèx na

ñuxăcû aixcûma toxû pengechaügüxû. ¹³ Rû yema na toxû pengechaügüxû, rû wûxi ga taăe nixî ga toxcèx. Natürü yema taăeărü yexera nixî ga yema taăe ga toxû yexmaxû ga yexguma nüxû tadèuxgu ga Titu ga ñuxăcû taxû ga taăe petanüwa na nayaxuxû. Rû aixcûma guxăma ga pema nixî ga wenaxărü poraăcû nüxû penangûchaüxêêxû. ¹⁴ Rû noxri tauta yéma naxûxgu ga Titu, rû namaă nüxû chixu na mexû i duüxügü na pixîgüxû. Rû ñuxma rû taxucèxma chaxăne, erü guxûma ga yema Titumaă nüxû chixuxû ga pechiga rû aixcûma ngêmaăcû nixî, yexgumarüü na aixcûma yîixû ga guxûma ga yema Tupanaărü ore ga pemaă nüxû tixuxû. ¹⁵ Rû ñuxma i Titu rû yexeraăcû pexû nangechaü i ngêxguma nüxna nacuèxăchigu na ñuxăcû meă naga pexînüêxû rû ñuxăcû nüxû pengechaüăcûma meă penayaxuxû. ¹⁶ Rû choma rû ta poraăcû pemaă chataăêxüchi, erü nüxû chacuèx na aixcûma peyanguxêêxû ga guxûma ga yema pemaă nüxû chixuxû.

8

Yema yaxôgüxû rû woo tama na namuărü dîeruăxgüxû, natürü yema nüxû yexmacû ga dîerumaă meă togüxû narüngüxêêgü

¹ Rû ñuxmax, Pa Chaueneêgüx, rû pemaă nüxû tixuxchaü na ñuxăcû Tupana namaă mecümaxû i ngêma yaxôgüxû i Machedóniăăneărü îănegüwa ngêxmagüxû. ² Rû woo taxû ga guxchaxügü nüxû na üpetügüxû, natürü nataăêgüama. Rû woo tama na namuărü dîeruăxgüxû, natürü yema nüxû yexmacû ga dîerumaă meă togüxû narüngüxêêgü. ³ Rû

choma nüxü chadau rü pemaã nüxü chixu rü nümagü rü taãêãcuma ngixü inaxãgü ga guxcüma ga dïeru ga nüxü tauxchacü na ngixü inaxãgüxü. Rü ngïetü yemaãrü yexera taãêãcuma ngixü inaxãgü. ⁴ Rü poraãcü toxü nacèèxügü na tama nüxna tanachuxuxücèx na yemaãcü yema togü ga taeneëgüxü nangüxëëgüxücèx. ⁵ Rü yema nagu tarüxïnüëxüãrü yexera ngixü inaxãgü ga yema yaxögüxü ga Machedóniããnecüãx. Yerü Tupananaxïra nügü naxãgü rü yemawena toxna nügü naxuaxügü na toga naxïnüëxücèx, yema Tupana naxwèxexürü. ⁶ Rü yemacèx Tituxü tacèèxü na wena petanüwa naxüxücèx na ngixü pinguxëëxücèx ga yema dïeru ga marü pemaã ngixü inaxügücü na ngixü penutaquëxexü naxcèx i ngëma togü i taeneëgü i nüxü nataxuxü. ⁷ Pema rü guxüwama meã ipexï erü meã peyaxögü, rü pexü natauxcha na meã nüxü pixuxü i Tupanaãrü ore erü meã nüxü pecuèx na ñacüchiga yïixü. Rü aixcüma togüxü perüngüxëëchaü, rü yema pexü tangüxëëxüãcüma pegü pengechaügü. Rü ñuxma rü ngëxgumarüü ta penaxwëxe na aixcüma meã ipexïxü nawa i ngëma mexü i nacüma na dïeru ngixü ipexãxü naxcèx i ngëma taeneëgü i nüxü nataxuxü. ⁸ Tama wüxi i mu nixï i ngëma pemaã nüxü chixuxü. Natürü chanaxwëxemare na nüxü pecuáxü na ñuxãcü taãêãcuma ngixü inaxãgüxü ga togü ga yaxögüxü. Rü pemaã nüxü chixu i ngëma na pema rü ta ngixü ipexãgüxücèx i ngëma dïeru i togü i taeneëgüarü ngüxëëcèx ixïcü, na ngëmaãcü ipenawéxücèx na aixcüma nüxü pengechaügüxü. ⁹ Erü pema rü marü nüxü pecuèx na ñuxãcü tamaã namecümáxü ga tórü

Cori ya Ngechuchu ya Cristu. Rū woo nūxŭ
 nayexma ga guxŭma, natŭrŭ ñoma wŭxi ga ngearŭ
 yemaxŭāxŭrŭŭ pexcèx nŭgŭ nixŭxēē na ngēmaācŭ
 pexŭ nangēxmaxŭcèx i muxŭma i mexŭgŭ. ¹⁰ Rŭ
 ñuxma rŭ perŭ mexŭcèx nixŭ i pemaā nūxŭ
 chixuxŭ i ngēma dīēruarŭ nutaquēxechiga. Rŭ
 taunecŭ ga ngupetŭcŭgutama nixŭ ga ipenaxŭgŭxŭ
 ga ngŭxŭ na penutacquēxexŭ. Rŭ yema rŭ aixcŭma
 perŭ ngŭchaŭmaā nixŭ ga penaxŭxŭ. ¹¹ Rŭ
 ñuxma rŭ yema noxri na meā ipenaxŭgŭxŭrŭŭ,
 rŭ name nixŭ i taāēācŭma rŭ perŭ ngŭchaŭmaā
 peyanguxēē rŭ ngēma dīēru i pexŭ ngēxmacŭwa
 ngŭxŭ ipexā naxcèx i ngēma peeneēgŭ i nūxŭ
 nataxuxŭ. ¹² Erŭ ngēxguma aixcŭma wŭxi ya
 duŭxē tŭmaārŭ ngŭchaŭmaā ngēma dīēru i tŭxŭ
 ngēxmèxcŭwa tŭmaēneēcèx ngŭxŭ itaxāxgu, rŭ Tu-
 pana rŭ taāēācŭma ngŭxŭ nayaxu. Erŭ nŭma ya
 Tupana rŭ taguma tŭxna ngŭxcèx naca i ngēma
 tŭxŭ taŭxcŭ. ¹³ Rŭ ngēmacèx tama chanaxwèxe i
 ngēma togŭxŭ na perŭngŭxēēxŭgagu pexŭ nataxu
 i pemax. ¹⁴ Natŭrŭ chanaxwèxe i guxāma tŭxŭ
 nangēxma i tacŭ i tanaxwèxexŭ, erŭ tama name
 na texéaxŭ nataxuxŭ i tacŭ. Rŭ ñuxma na pexŭ
 nangēxmaxŭ i perŭ dīēru, rŭ name nixŭ i nūxŭ
 perŭngŭxēēgŭ i ngēma taeneēgŭ i nūxŭ natax-
 uxŭ. Rŭ ngŭrŭāchi to i ngunexŭgu i pema pexŭ
 natauxgu, rŭ nŭmagŭ rŭ tá nūxŭ nūxŭ nangēxma na
 pexŭ nangŭxēēgŭxŭcèx. Rŭ ngēmaācŭ tá guxātama
 tawŭxigu. ¹⁵ Rŭ Tupanaārŭ ore i ūmatŭxŭwa rŭ
 ñanagŭrŭ:

“Guxema muxŭma tŭxŭ yexmaxē rŭ taxuŭma
 tŭxŭ ínayaxŭ. Rŭ guxema noxretama tŭxŭ
 yexmaxē rŭ tama tŭxŭ inayataxu”,

ñanagürü.

Titu rü namüçügüchiga

¹⁶ Natürü Tupanana moxē chaxã, erü nüma rü Tituxŭ nagu narüxĩnũxēē na aixcūma pexŭ nangŭxēēxŭcèx, ngēma choma pegu charüxĩnũxŭrŭŭ. ¹⁷ Rŭ nüma ga Titu rü: “Ngŭ” ñanagürü na wena petanüwa chanamuxŭ. Yerü nüma rü woetama poraãcü pegu narüxĩnũ. Rŭ ngēmacèx i ñuxma rü wena petanüwa naxŭ, erü nüxŭ nangŭchaŭ. ¹⁸ Rŭ Titumaã ngēma tanamu i wüxi i taeneē i guxŭma i yaxōgŭxŭ nüxŭ ngechaŭgŭxŭ erü nüma rü aixcūma meã nüxŭ nixu i Tupanaärü ore i tüxŭ maxēxēēxŭ. ¹⁹ Rŭ tama ngēmacèxicatama nixĩ. Erü guxŭma i ngēma yaxōgŭxŭ rü ngēma taeneēxŭ naxunetagŭ na toxŭ íyaxŭmücŭxŭcèx rü toxŭ nangŭxēēxŭcèx i ngēxguma Yerucharéŭwa ngĩxŭ tangexgu i ngēma dīeru, na ngēmaãcü nüxŭ ticuèxŭŭgŭxŭcèx ya tórü Cori, rü na guxãma nüxŭ dauxŭcèx na ñuxãcü taãēãcüma yigŭ rüngŭxēēgŭxŭ. ²⁰ Rŭ Ítayaga i ngēma taeneē, erü tama tanaxwèxe i texé toxŭ tixu i yixcama ngĩxcèx i ngēma tacü i dīeru i taeneēgŭcèx ngĩxŭ inutaquēxegŭcü. ²¹ Erü tama Tupanapēxewaxicatama tanaxwèxe na meã tanaxŭxŭ, natürü guxŭ i duŭxŭgŭpēxewa rü ta tanaxwèxe na meã tanaxŭxŭ. ²² Rŭ Titumaã rü ngēma to i taeneēmaã petanüwa tanamu i wüxi i to i taeneē i toxŭ nüxŭ dauxēēxŭ na aixcūma nüxŭ nangŭchaŭ na naxŭãxŭ i Tupanaärü puracü. Rŭ ñuxma rü yexeraãcü petanüwa naxŭxchaŭ i nümax, erü nüxŭ nacuèx na ñuxãcü pema rü taãēãcüma togŭxŭ na perüngŭxēēgŭchaŭxŭ.

²³ Rû ngëxguma texé pexna caxgu na texe yiixũ ya Titu, jrû tûmamaã nüxũ pixu na nûma rû chomücü ya wüxiwa chomaã pexcèx puracücü na yiixũ! Rû ngëma taxre i togü i namücügü, rû ngëma nixĩ i yatügü i guxũma i yaxögüxũ nüxũ unetagüxũ na Cristuarü puracü naxügüxücèx. Rû nûmagü rû aixcüma norü maxũmaã Cristuxũ nicuèxüügü. ²⁴ Rû ngëmacèx chanaxwèxe i ngëma taeneëgüxũ nüxũ pedauxëë na aixcüma nüxũ pengechaügüxũ, na guxũma i yaxögüxũ nüxũ cuèxgüxücèx i ngëmachiga. Rû ngëmaãcü guxũma i ngëma yaxögüxũ tá nüxũ nacuèxgü na aixcüma yiixũ i ngëma mexũ i ore i pechiga namaã nüxũ tixuxũ.

9

Yema dïëru ga yema togü ga yaxögüxücèx ngïxũ inutaquëxecüchiga

¹ Rû taxucèxma tûxcüũ pexcèx chanaxümatü ngïchiga i ngëma dïëru i ngïxũ penutaquëxegücü naxcèx i ngëma taeneëgü i yaxögüxũ i Yudéaanewa ngëxmagüxũ. ² Erü marü nüxũ chacuèx rû perü ngúchaũmaã ipenaxã i ngëma dïëru. Rû guxũguma taãëacüma ngëma yaxögüxũ i Machedóniãanewa ngëxmagüxũmaã nüxũ chixu na ñuxácü i pema i Acayaanewa ngëxmagüxe rû naĩ ya taunecügutama marü ípememarexũ na ngïxũ ipexägüxũ i ngëma dïëru. Rû yema rûmumaëxũ ga yaxögüxũ ga Machedóniãanecüãx, rû yexguma nüxũ naxĩnüëgu na ñuxácü taãëacüma togücèx ngïxũ na ipexägüxũ i perü dïëru, rû nûmagü rû ta inanaxügü na ngïxũ inaxägüxũ. ³ Natürü i ñuxma rû ngëma petanüwa chanamugü i ngëma

taeneēgū na nūxū nadaugūxūcèx, na aixcūma yīixū i ngēma nūxū chixuxū i pechiga. Rū chanaxwèxe na aixcūma ípememarexū na ngīxū ipexāxū i ngēma dīēru, ngēma taeneēgūmaā nūxū chixuxūrūū. ⁴ Erū ngēxguma chi ñuxre i taeneēgū i Machedóniāānecūāx rū ngūrūāchi chomaā petanūwa naxīxgu, rū tama chanaxwèxe na pexū na iyangauxū na tama aixcūma ípememarexū na ngīxū ipexāxū i ngēma dīēru. Rū toxū rū chi wūxi i ānexūchi nixī, erū marūchirēx namaā nūxū tixu na ñuxācū aixcūma ípememarexū na ngīxū ipexāxū i ngēma dīēru. Rū maneca pexū rū chi ta wūxi i ānexūchi nixī. ⁵ Rū ngēmacèx nixī i chauxcèx namexū na naxcèx íchaçaxū i ngēma taeneēgū na nūxīra petanūwa naxīxūcèx rū nūmatama pexū yanangūxēēgūxūcèx na ngīxū penutaquēxegūxūcèx i ngēma dīēru ga ūpamama ngīxū pixucū. Rū ngēmaācū aixcūma tá ímемare i ngēma dīēru i ngēxguma ngēma changuxgu. Rū togū tá nūxū nadaugū na aixcūma perū ngúchaūmaā yīixū na ngīxū ipexāgūxū rū tama aūācūma na yīixū. ⁶ Rū nūxna pecuèxāchie i ngema dexa i ñaxū:

“Rū yíxema noxretama i nanetūchire itoxe, rū noxretama i norū o tayaxu. Natūrū yíxema muxū i nanetūchire itoxe, rū muxūma i norū o tayaxu”,

ñaxū! ⁷ Rū wūxichigū tanaxwèxe na ngīxū itaxāxū i ngēma ngīgu tarūxīnūcū na ñuxre ngīxū itaxāxchaūxū. Rū tama name i aūācūma ngīxū itaxā rū ēxna texé tūxū muācūma ngīxū itaxā. Erū Tupana rū nūxū nangechaū i ngēma duūxū i taēēācūma ngīxū ixāxū. ⁸ Rū

Tupanamēxēwa nangēxma na poraācū pexna naxāāxūcèx i guxūma i mexū i pexū taxuxū, na guxūguma pexū nangēxmaxūcèx i ngēma penaxwèxexū rü naetü na pexū íyaxūxūcèx na togūxū namaā perūngūxēēgūxūcèx. ⁹ Tupanaārū ore i ümatūxūwa rü ñanagürü:

“Yima yatü ya mecü rü norü ngúchaūmaā meā inanaxā nüxna i ngēma duūxūgü i taxuūma nüxū ngēxmaxū. Rū Tupana rü tá guxūgu nüxna nacuèxāchi na ñuxācū namecūmaxū i nümax”,

ñanagürü. ¹⁰ Tupana nixī ya tūxna naxācū ya nanetūchire na inatoxūcèx, rü tūxna naxācū i ōna na nangōxūcèx. Rū nüma tá nixī i pexna naxāāxū ya guxūnema ya nanetūchire ya penaxwèxene na ipenatoxūcèx. Rū nüma tá nanaxūxēē rü nanayaxēē ya yima nanetūchire. Rū tá nanamuxēē i norü o, na muxūchixū nawa peyaxuxūcèx na ngēmamaā togūxū perūngūxēēgūxūcèx. ¹¹ Rū ngēmaācū i pema rü tá pexū nangēxma i guxūma i mexū na tauxchaācūma nüxū perūngūxēēgūxūcèx i togū. Rū ngēxguma ngēma togū i taeneēgūxūtawa ngīxū tangegūgu i ngēma dīeru i naxcèx ngīxū ipexācū, rü nümagü rü tá poraācū Tupanana moxē naxāgū ngixcèx. ¹² Erü ngēxguma nüxna ngīxū taxāxgu i ngēma dīeru i nüxū ngīmaā perūngūxēēgücū i ngēma taeneēgū, rü tama ſacū i nüxū taxuxūcèxicatama ta nixī, natürü naetü i nümagü i taeneēgū rü perü āmaregagu tá poraācū Tupanana moxē naxāgū. ¹³ Rū nümagü i ngēma taeneēgū rü tá Tupanaxū nicuèxūūgū, erü ngēma perü āmaremaā tá nüxū nüxū pedauxēē na aixcūma naga pexīnūēxū i

Cristuarü ore i mexŭ. Rŭ nümagü rŭ tá Tupanana moxē naxāgü naxcèx i ngēma perü āmare i perü ngúchaŭmaā nüxna rŭ guxŭma i yaxōgŭxŭna pexāgŭxŭ. ¹⁴ Rŭ ngēxgumarŭŭ i ngēma taeneēgü rŭ tá poraācü pexcèx nayumŭxēgü, erü pexŭ nangechaŭgü. Rŭ tá Tupanana moxē naxāgü naxcèx na ñuxācü nüma ya Tupana poraācü pexŭ nangŭxēxŭ na yemaācü pexŭ natauxchaxŭcèx na nüxŭ perŭngŭxēēgŭxŭ. ¹⁵ Rŭ ngēmacèx i ñuxma rŭ Tupanana moxē taxā, yerü tŭxna nanamu ga Nane na tórü āmare yīxŭcèx. Rŭ nataxuma i ore i nagu mexŭ na nüxŭ ixuxŭcèx na ñuxācü namaā itaāēgŭxŭchixŭ i ngēma āmare.

10

Pauruarü ore rŭ aixcŭma nixī yerü Tupana nixī ga nüxna āgacŭ

¹ Rŭ ñuxma rŭ yema Cristu yaxna tamaā naxīnŭxŭrŭŭ rŭ tamaā namecŭmaxŭrŭŭ, rŭ choma rŭ ta pemaā yaxna chaxīnŭācüma rŭ pemaā chamecŭmaācüma pexŭ chacèxŭ na chauga pexīnŭēxŭcèx. Erü nümaxŭ i duŭxŭgü rŭ nüxŭ nixugü na pexŭ chamuŭxŭ ega pexŭtawa changēxmagu natŭrŭ ngēxguma pexna chayaxŭgu rŭ tama pexŭ chamuŭ. ² Natŭrŭ ngēxguma ngēma petanŭwa chaxŭxgu, rŭ chierü natauxguma na ŭacŭcèx namaā chaporagaxŭ rŭ na chanaxucŭxēxŭ i ngēma duŭxŭgü i petanŭwa toxŭ ixuxŭ na ñoma tama yaxōgŭxŭrŭŭ na tamaxēxŭ. Erü choma rŭ íchamemare na namaāxŭchi na chidexaxŭ. ³ Rŭ aixcŭma woo duŭxŭgü tixŭgü natŭrŭ tama ñoma i naanecŭāxŭrŭxŭ togü tadai i ngexguma

ítanapoxūgu i Tupanaarū ore. ⁴⁻⁵ Erū ngēma toxne i namaã ítanapoxūxū i Tupanaarū ore rū tama ñoma i nañecūāx namaã āxnexū nixī. Erū toma rū toxū nangēxma i Tupanaarū pora na ngēmamaã itayanaxoxēēxūcèx i Chatanáarū pora. Rū ngēmaācū itayanaxoxēē i guxūma i chixexū i ore i Tupanaxū namaã yaxugūgūxū i duūxūgū. Rū ngēmaācū itayanaxoxēē i guxūma i Tupanaarū uwanūgūarū ore i nūgū namaã yacuēxūūgūācūma duūxūgūmaã nūxū yaxugūgūxū na tama Tupanaāxū yaxōgūāxūcèx. Rū guxūma i tacū i nagu naxīnūēxū i ngēma duūxūgū i chixexū, rū Cristuna tanaxuaxū na nūma namaã inacuāxūcèx. ⁶ Rū wūxicana marū meã Cristuga pexīnūēgu, rū toma rū ítamemare na tūxū tapoxcuexū ya guxāma ya texé ya tama naga īnūēxē i Cristuarū ore. ⁷ Pema rū norū dūxētūxūnewaxicatama nixī i penangugūxū i wūxi i duūxū. Natūrū ngēxguma texé tūgū cuèxgu na Cristuarū duūxū tīxū, rū name nixī i nūxū tacuèx na toma rū ta tūmarūū Cristuarū duūxūgū tixīgūxū. ⁸ Rū woo írarūwa chanangupetūxēē na chaugū chicuēxūūxū namaã i ngēma na Tupana toxū muxū, natūrū taxucèxma naxcèx chaxāne. Erū aixcūma Cori nixī ya toxū mucū na pexū tarūngūxēēgūxūcèx na yexeraācū meã peyaxōgūxūcèx. Rū tama tacū rū chixexūgu pexū na tayixēēxūcèx nixī i toxū namuxū. ⁹ Rū tama chanaxwèxe i nagu perūxīnūē na pexū íchabaixgūchaūxū namaã i ngēma poperagū i pexcèx chaxūmatūxū. ¹⁰ Erū nūmaxū i duūxūgū rū nūxū nixugū na chorū poperawaxicatama pexū íchabaixgūxū, natūrū chomaxūchi pexūtawa

changexmagu rü tama aixcūma nūxū chacuèx na ñuãcū mea chidexaxū na ngemaãcū chauga pexū chaxīnūexēēxūcèx, ñaxūmaã choxū nixugūe. ¹¹ Natürü texe ya ngemaãcū idexáxe rü tanaxwèxe i nagu tarūxīnū rü ngēma pexna tayaxūguãcūma torū poperawa pemaã nūxū tixuxūrū tátama tixīgū i ngēxguma petanūwa tangēxmagūgu. ¹² Toma rü tama tanaxwèxe i namaã togū tawūxiguxēē rü ēxna nagu togū tangugū i ngēma duūxūgū i nūgūtama icuèxūūgūxū. Nūmagū rü nūgūtama nawomūxēēgū, erū nūgūmaã nūgū nawūxiguxēē rü nūgūgutama nūgū nangugū. ¹³ Natürü toma rü tama togū namaã ticuèxūūgū i ngēma yaxōgūxū i tama Tupana toxmēxwa ngēxmagūxēēxū. Yerū Tupana nixī ga tomaã nūxū ixucū na ngextá nanaxwèxexū na tapuracūexū. Rū nūma nixī ga noxri Corītiuwa ga petanūwa toxū nangugūxēēxū na pemaã nūxū tixuxūcèx ga norū ore. ¹⁴ Rū yemaãcū toxira nixī ga noxri petanūwa tangugūxū na pemaã nūxū tixuxūcèx ga yema Cristuarū ore. Rū ngēmacèx i ñuxma na petanūwa taxīxū, rü tama tanangupetūxēē ga yema Tupana tomaã nūxū ixuxū, yerū nūma nixī ga toxū namuxū na pexū tarūngūxēēgūxūcèx. ¹⁵ Rū ngemacèx tama togūarū puracūmaãmare nixī i togū ticuèxūūgūxū. Rū tama nūxū tachopetūchaū i ngēma Tupana tomaã nūxū ixuxū na pexū tangúexēēxū. Natürü ngema pexū tanaxwaexū nixī na yexeraãcū nūxū pecuáxū i Tupanaarū ore na ngemaãcū yexera peyaxōgūxūcèx. ¹⁶ Rū ngēxguma marū petanūwa tangugūguwena rü tanaxwèxe i ngēma duūxūgū i perū yéamaxūra ngēxmagūxū i ngextá taguma

texé nüxŭ íixuxŭwa taxĩ na ngẽmamaã rŭ ta nüxŭ tixuxŭcèx i ore i mexŭ. Erŭ tama tanaxwèxe i togŭarŭ puracŭmaã togŭ ticuèxŭŭgŭ. ¹⁷ Erŭ Tupanaãrŭ ore i ũmatŭxŭwa rŭ ñanagŭrŭ:

“Rŭ ngẽxguma texé tŭgŭ icuèxŭŭchaŭgu, rŭ name nixĩ i tŕrŭ Corixŭ ticuèxŭŭ, erŭ nŭma nixĩ i tŭxŭ nangŭxèèxŭ”,

ñanagŭrŭ i ngẽma ore. ¹⁸ Erŭ ngẽma yatŭ i aixcŭma Tupanapèxewa mexŭ rŭ tama nŭgŭtama nicuèxŭŭ. Natŭrŭ ngẽma yatŭ i tŕrŭ Cori nüxŭ icuèxŭŭxŭ nixĩ i aixcŭma Tupanapèxewa mexŭ.

11

Pauru rŭ nüxŭ nixuchiga ga yema orearŭ uruŭgŭneta ga tama Tupana imugŭxŭ

¹ Rŭ ñuxma i ngẽma tá pemaã nüxŭ chixuxŭ, rŭ bexmana pexcèx rŭ wŭxi i ngẽãẽmare nixĩ, natŭrŭ chanaxwèxe i choxŭ iperŭxĩnŭẽmare rŭ yaxna chomaã pexĩnŭẽ. ² Erŭ Tupana pexŭ inuxŭxŭrŭŭ pexŭ chinuxŭ. Erŭ chaugagu nixĩ i Cristuaxŭ peyaxŕgŭxŭ, rŭ marŭ Cristuna pexŭ chaxuaxŭ na noxrŭxicatama pixĩgŭxŭcèx. Rŭ ngẽmacèx chanaxwèxe i ngearŭ chixexŭãẽ Cristuxŭ pexŭ chawèx ñoma wŭxi i pacŭ i taguma yatŭxŭ cuèxcŭrŭŭ. ³ Natŭrŭ chaxoegaãẽ rŭ yema ãxtape norŭ doramaã Ebaxŭ na womŭxèèxŭrŭŭ, ngŭrŭãchi tá ta texé pexŭ tawomŭxèẽ, na nüxŭ perŭxoexŭcèx na Cristugu perŭxĩnŭèxŭ rŭ naxcèxicatama na pemaxèxŭ. ⁴ Erŭ pema rŭ tauxchaãcŭ nixĩ na pexŭ nawomŭxèègŭxŭ. Rŭ ngẽxguma ínangugŭgu i duŭxŭgŭ i pemaã nüxŭ ixuxŭ i to i Ngechuchuchiga ya tama yima toma nüxŭ tixuchigacŭ, rŭ pema rŭ nüxŭ peyaxŕgŭ i

ngēma duūxūgū. Rū pema rū taāēācūma penayaxu i to i naāē i tama Tupanaāē i Üünexū ga marū peyaxuxū ixīxū. Rū peyaxōgū i to i ore i tama Tupanaārū ore i mexū ga noxri peyaxuxū ixīxū. ⁵ Dūcèx, rū woo nawe perūxīxgu i ngēma togū i orearū uruūgūneta, natürū chauxcèx rū taxuwama choxū narüyexeragū. ⁶ Rū woo tama choxū nangēxmagu i tauxcha na duūxūgūpēxewa chidexaxū, natürū aixcūma meā nūxū chacuèx i ngēma nachiga chidexaxū. Rū ngēma rū guxūma i torū puracūwa marū pexū nūxū tadauxēē i guxūguma. ⁷ ¿Pexcèx rū chixexū pemaā chaxū ga yexguma chaugū ícharūxíragu na pexū chataxēēxūcèx rū choxmēxmaā chapuracūgu na ngetanūācūma pemaā nūxū chixuxū ga Tupanaārū ore i tūxū maxēxēēxū? ⁸ Rū aixcūma yema togū ga yaxōgūxū choxna ngīxū āgücū ga dīeru ngīxū chayaxu na yemamaā petanūwa chapuracūxūcèx rū pexū charūngūxēēxūcèx. ⁹ Rū yexguma petanūwa chayexmagu rū aixcūma choxū itaxu ga dīeru, natürū taguma texéna ngīxcèx chaca. Rū taeneēgū ga Machedóniāānewa ne īxū rū choxna ngīxū naxāgū ga yema choxū tauxcū. Rū yemaācū tama pexūtawa ngīxcèx íchaca ga yexguma. Rū ñuxma rū ta tagutáma tacūcèx pexna chaca. ¹⁰ Rū Cristu ya chowa ngexmacüégagu pemaā nūxū chixu i ngema na aixcūma ngetanūācūma petanūwa chapuracūxū. Rū ngema rū chorū taāxē nixī. Rū taxucürüwa texe i guxū i Acáyaanewa choxna tanayaxu i ngema taāxē. ¹¹ ¿Rū tacūcèx yīxū i ngēmaācū chidexaxū? ¿Éxna pexcèx rū tama pexū changechaūxūcèx

yīxǔ i ngēmaācū chidexaxǔ? Dūcèx, pemaā nūxǔ chixu rü Tupana nūxǔ nacuèx na ñuxācū aixcūma pexǔ changechaǔxǔ. ¹² Natürü ngēma na ngetanūācūma pemaā nūxǔ chixuxǔ i ngēma ore, rü ngēmaācū tá chanaxüecha na taxucürüwa chixri chauchiga yadexagüxcèx i ngēma togü i orearü uruügüneta i nügü ixuxǔ na toxrüǔ naxügüāxǔ i Tupanaärü puracü. ¹³ Nūmagü rü aixcūma orearü uruügüneta nixīgü, rü duǔxügüxǔ nawomüxēēgü. Rü nūmagü rü togu nügü nicuxgü, rü nügü nixugü na Cristu yamugüxǔ. ¹⁴ Rü ngēma rü taxucèxma namaā pebaixāchiāēgü. Erü woo i Chataná rü ta rü Tupanaärü orearü ngeruügü i daxüçüāx i yauracüxürüācū nügü nangoxēē. ¹⁵ Rü ngēmacèx woetama ngēmaācū nixīgü i ngēma duǔxügü i Chatanáāxǔ puracüexǔ. Rü nūmagü rü duǔxügü i mexǔ ügüxügu nügü nicuxgü. Natürü ngēma ngēmaācū ixīgüxǔ, rü Tupana tá nanapoxcue naxcèx i ngēma chixexǔ i naxügüxǔ.

Pauru rü yema puracü ga Ngechuchu nawa namuxüwa ngüxǔ ninge

¹⁶ Rü wena pemaā nūxǔ chixu rü tama chanaxwèxe i nagu perüxīnūē na wüxi i āüāēxǔ chiǔxǔ. Natürü ngēxguma chi ngēmaācū chomaā nagu perüxīnūēgu, rü tama chanaxwèxe i choxna penachuxu na ñoma wüxi i āüāēxürüü chaugüétüwa chidexaxǔ, na ngēmaācū choma rü ta írarüwa chaugütama chicuèxüxüxcèx. ¹⁷ Rü ñuxma na chaugüétüwa chidexaxǔ rü ngēma rü tama tórü Coriarü mu nixī. Natürü ñoma wüxi i āüāēxǔ nügü icuèxüxürüü nixī i chidexaxǔ. ¹⁸ Rü ñuxma na nangēxmaxǔ i muxüchixǔ i duǔxügü i

ñoma i naãnewa nügü icuèxüügüxü, rü choma rü tá ta írarüwa chaugü chicuèxü. ¹⁹ Pema rü nagu perüxĩnüë rü nüxü cuèxüchigüxü pixĩgü. Natürü taãëácüma yaxna namaã pexĩnüë i ngëma duüxügü i tama naãëxü icuáxü. ²⁰ Rü yaxna namaã pexĩnüë i ngëma duüxügü i nügüxü pexü puracüexëëxü, rü ngëma ngetanüãcüma pexü puracüexëëmarexü, rü ngëma pexü womüxëëgüxü, rü ngëma chixri pexü yaxgüxü, rü ngëma pemaã guxchigagüxü. ²¹ Rü woo wüxi i ãnexüchi nixĩ na pemaã nüxü chixuxü, natürü chauxcèx rü tama aixcüma pexü nüxü tadauxëë ga torü pora ga yexguma petanüwa tayexmagügu. Natürü ñuxma na tama namuëxü na nügü yacuèxüügüxü i ngëma togü i duüxügü, rü choma rü ta taxucèxma chamuü na chaugüétüwa chidexaxü woo pexcèx rü taxuwama namexgu i ngëma nüxü chixuxü. ²² Nümagü rü nügü yaxugügu rü Yudíugü nixĩgü. Natürü choma rü ta Yudíu chixĩ. Rü nümagü nügü yaxugügu rü Iraétanüxügü nixĩgü. Natürü choma rü ta rü Iraétanüxü chixĩ. Rü nümagü rü nügü yaxugügu rü Abráütanüxü nixĩgü. Natürü choma rü ta Abráütanüxü chixĩ. ²³ Nümagü rü nügü yaxugügu rü Cristuaxü napuracüe. Natürü choma rü norü yexera Cristuaxü chapuracü. Rü ngëma ñachagürü pexü woo pema nagu perüxĩnüëgu na ñoma wüxi i ãüãëxürü chidexaxü. Rü ngëma duüxügüarü yexera poraãcü Tupanaãxü chapuracü. Rü norü yexera chapoxcu, rü norü yexera choxü naçuaixgü ga duüxügü. Rü muëxpüxcüna rü ãücümaxüchixüwa chayexma rü wixgüxüchi taèx choxü nimèxgü. ²⁴ Rü 5 ëxpüxcüna nixĩ ga 39 ga

cuaximaã choxũ napoxcu-gũxũ ga chautanũxũgũ ga Yudíugũ. ²⁵ Rũ tomaẽxpũxcũna nixĩ ga naĩmaã choxũ naçuaixgũxũ, rũ wũxicana ga nutamaã choxũ ínamuxũchigũxũ. Rũ tomaẽxpũxcũna nixĩ ga guma wapuru ga nagu chixũxũne rũ chomaã inanguxũ. Rũ wũxicana ga yexguma chomaã inanguxgu ga wapuru rũ wũxi ga chũtaxũ rũ wũxi ga ngunexũ chinge na taxũ ga taxtũarũ ngãxũtũgu mũrapewaétũgu chatunagũãcũma chiwẽxẽxũ. ²⁶ Rũ poraãcũ nu ne chanaxũ, rũ poraãcũ ãcũmaxũwa chayexma yerũ natũgũ ga ãcũmaxũgu chixũgũ, rũ ngĩtèèxgũxũ rũ chixexũ chomaã naxũgũchaũ. Rũ woo chautanũxũgũ ga Yudíugũtanũwa, rũ woo yema duũxũgũ ga tama Yudíugũ ixĩgũxũtanũwa, rũ woo ãnegũwa, rũ woo namagũwa, rũ woo taxtũ i taxũwa rũ ãcũmaxũwa chayexma. Rũ yema duũxũgũ ga chomũcũgũneta ixĩgũxũtanũwa rũ ta ãcũmaxũwa chayexma. ²⁷ Rũ poraãcũ chataarũ puracũãx, rũ muxũchixũ ga guxchaxũgũ choxũ nangupetũ. Rũ muẽxpũxcũna rũ tama chape, rũ chataiya, rũ chitawa. Rũ muẽxpũxcũna rũ tama chachibũ, rũ choxũ nanadeyu, rũ choxũ nataxu ga chauxchiru. ²⁸ Rũ naetũwa i guxũma i ngẽma, rũ guxũ i ngunexũgu rũ chaxoegaãẽ naxcèx i guxũma i ngẽma yaxõgũxũ i guxũ i ãnewa ngẽxmagũxũ. ²⁹ Rũ ngẽxguma chi texé tama poragu, rũ choxũ rũ ta nangux. Rũ ngẽxguma chi wũxie texéxũ pecadugu nguxẽẽgu, rũ chauãẽwa nangux i ngẽma. ³⁰ Natũrũ ngẽxguma chi chaugũ chicuèxũũchaũgu, rũ tá chaugũ chicuèxũũ naxcèx na duũxũgũ choxũ dauxũ na taxuwama chamexũ. ³¹ Rũ Tupana ya

tórü Cori ya Ngechuchu ya Cristunatü ya mecü na guxŭguma nüxŭ icuèxüŭgŭxŭ, rü nüxŭ nacuèx na aixcūma yīxŭ i ngēma nüxŭ chixuxŭ. ³² Rü yexguma Damacuwa chayexmagu, rü guma ĩāneārü āēxgacü ga Aretaarü ngŭxēēruŭ, rü norü churaragŭxŭ namu na nüxna nadaugŭxŭcèx ga guma ĩāneārü poxeguxŭārü ĩāxgŭ na choxŭ yayauxgŭxŭcèx ga yexguma chi yéma íchaxŭŭxgu. ³³ Natürü yema ĩāneārü poxeguxŭārü ĩāxācūwa rü wüxi ga pexchigu choxŭ ínarüçŭxŭetaŭgŭ ga chomücŭgŭ. Rü yemaäcŭ chiña naxchaxwa ga yema āēxgacü.

12

Tórü Cori rü Pauruxŭ nangoxetüxēē rü nüxŭ nüxŭ nacuèxēē ga tacü ga ēxŭguxŭ

¹ Taxuwama name na texé tŭgŭ icuèxüŭxŭ. Natürü tá pemaã nüxŭ chixuama na ñuxācŭ tórü Cori choxŭ nangoxetüxēēxŭ rü ñuxācŭ choxŭ nüxŭ na nacuèxēēxŭ ga tacü ga ēxŭguxŭ. ² Rü 14 ga taunecü marü nangupetü ga na Tupana daxŭguxŭ ga nañnewa ga nüma ínayexmaxŭwa choxŭ nagaxŭ. Natürü tama nüxŭ chacuèx rü chauāēwaxicatama nixī ga yéma choxŭ nagaxŭ, rü ēxna guxŭ ga chaxunemaã yīxŭ ga yéma choxŭ nagaxŭ. Rü Tupanaxīcatama nüxŭ nacuèx i ngēma. ³⁻⁴ Rü aixcūma meãma nüxŭ chacuèx na daxŭguxŭ ga nañnewa choxŭ nagaxŭ ga Tupana, natürü tama nüxŭ chacuèx rü guxŭ ga chaxunemaã yéma choxŭ naga rü ēxna tama. Rü Tupanaxīcatama nixī ya nüxŭ cuácŭ i ngēma. Rü yéma nüxŭ chaxīnŭ ga ore ga ēxŭguxŭ i guxŭma i duŭxŭgŭna

chuxuxŭ na nŭxŭ yaxugŭxŭ. ⁵ Rŭ choma rŭ chi name na chaugŭ naxcèx chicuèxŭxŭ i ngēma, natŭrŭ tãutãma ngēmaãcŭ chanaxŭ. Erŭ ngēma ngŭxŭ na chingexŭmaãxĭcatama tá nixĭ i chaugŭ chicuèxŭxŭ. ⁶ Natŭrŭ ngēxguma chi chaugŭ chicuèxŭxŭchaŭgu, rŭ tãu chima wŭxi i ngēãēmare nixĭ i ngēma, erŭ aixcŭma nixĭ i ngēma ore i nŭxŭ chixuxŭ i chauchiga. Natŭrŭ tama chaugŭ chicuèxŭxŭ na taxúema nagu rŭxĭnŭxŭcèx na ngēma chowa nŭxŭ naxĭnŭèxŭ rŭ nŭxŭ nadaugŭxŭãrŭ yexera chiŭxŭ. ⁷ Natŭrŭ tórŭ Cori rŭ tama nanaxwèxe i poraãcŭxŭchima chaugŭ namaã chicuèxŭxŭ ga yema èxŭguxŭ ga mexèchixŭ ga choxŭ nŭxŭ nacuèxèèxŭ. Rŭ yemacèx chaxunewa nananguxèè ga wŭxi ga choxŭ ngŭxŭ ñoma wŭxi ya tuxu chaxunewa ingaxixŭrŭ. Rŭ yema rŭ ñoma wŭxi ga Chatanáãrŭ orearŭ ngeruŭrŭ chauxŭtawa nangu na choxŭ nachixewexŭcèx na tama chaugŭ chicuèxŭxŭcèx. ⁸ Rŭ tomaèxpŭxcŭna tórŭ Corina chaca na choxŭ iyanaxoxèèãxŭcèx ga yema choxŭ ngŭxŭ. ⁹ Natŭrŭ nŭma ya tórŭ Cori rŭ ñanagŭrŭ choxŭ:

“Rŭ cuma nŭxŭ cucuèx na guxŭguma cuxŭ changechaŭ, rŭ ngèxĭcatama nixĭ i cunaxwèxexŭ. Rŭ ngēma duŭxŭgŭ i tama poraexŭwa nixĭ i aixcŭma chanangoxèèxŭ i ñuxãcŭ na chaporaxŭ”, ñanagŭrŭ choxŭ. Rŭ ngēmacèx chataãè ega tama chaporagu. Erŭ ngēxguma tama chaporagu rŭ ngēxguma nixĭ i chowa inawéãxŭ i norŭ pora ya Cristu. ¹⁰ Rŭ ngēma na Cristuxŭ na changechaŭxŭgagu nixĭ i yaxna namaã chaxĭnŭxŭ ega woo chaturagu rŭ woo țacŭ

chomaã yaxugüegu i duũxüğü. Rũ woo choxũ natauxgu i chorũ ngẽmaxüğü, rũ woo duũxüğü rũ chowe yangẽxũtanügu, rũ woo guxchaxüğü choxũ ngẽxmagu rũ Cristucèx rũ yaxna namaã chaxĩnü i guxũma i ngẽma. Erũ ngẽxguma chaturagu, rũ ngẽxguma nixĩ i yexeraãcü Cristu choxũ poraxẽẽxũ.

Pauru rũ naxcèx naxoegaãẽ ga yema yaxõgüxũ ga Corĩtiuwa yexmagüxũ

¹¹ Maneca ñoma wüxi i ãũãẽxürüũ chidexa, erũ ngẽmaãcü chaugü chicuèxũũ. Natürü pegagutama nixĩ i düxwa ngẽmaãcü chaugüétüwa chidexaxũ, yerü pema chi nixĩ ga choxũ picuèxüügüxũ, rũ tama i chomax. Rũ woo taxuwama chame i chomax, natürü taxuwama choxũ narüyexeragü i ngẽma orearü uruüguneta i nawe perüxĩxũ.

¹² Rũ yexguma petanüwa chayexmagu, rũ yaxna pemaã chaxĩnüãcüma pexũ nüxũ chadauxẽẽ na aixcüma Cristu choxũ muxũ na nüxũ chixuxüçèx ga norü ore. Rũ cuèxruüğümaã pexũ nüxũ chacuèxẽẽ ga yema. Rũ pexũ nüxũ chadauxẽẽ ga taxũ ga mexüğü ga Tupanaãrũ poramaã üxũ.

¹³ Rũ yexguma petanüwa chayexmagu rũ pemaã chamecüma yema guxũma ga togü ga yaxõgüxũmaã na chamecümaxürüütama. Natürü wüxiwaxicatama nixĩ ga íchatüxũ yerü ga petanüwa rũ tama ngĩxũ chayaxu ga dĩeru yema togü ga yaxõgüxũtanüwa ngĩxũ chayaxuxürüũ. Rũ chanaxwèxe i choxũ nüxũ pengechaũ i ngẽma. ¹⁴ Rũ ñuxma rũ marü íchamemare na norü tomaẽxpüxcüna pexũ íchayadauxũ. Rũ tãütáma tacüçèx pexna chayaca. Erũ tama perü ngẽmaxüğüçèx petanüwa chaxũ, natürü

pexcèxüchi nixĩ i ngema chaxũxũ. Pema rü
 chauxacügü pixĩgü i Tupanaãrü orewa. Rü
 ngẽma papá rü mamáãrü puracü nixĩ na
 naxãcügüna naxããxũ i ngẽma nüxũ taxuxũ. Rü
 tama naxãcügüarü puracü nixĩ na nanatüna rü
 naẽna naxãgüãxũ. ¹⁵ Rü choma rü íchamemare
 na chorü ngúchaũmaã pexcèx ichanaxãxũ
 i guxũma i tacü i choxũ ngẽxmaxũ rü woo
 chaugütama rü ta na ichaxãxũ na aixcüma
 meã peyaxõgüxücèx. Natürü chauxcèx rü
 ngẽxguma yexeraãcü pexũ changechaũgu, rü
 pema rü yexeraãcü nüxũ perüxoetanü na choxũ
 pengechaũxũ. ¹⁶ Rü nümaxũ i duũxügü i petanüwa,
 rü woo nüxũ nacuèxgü na taguma tacücèx
 pexütawa íchaçaxũ, natürü nümagü rü nüxũ
 nixugüama na pexũ chawomüxẽẽcüma perü
 dĩeru ngĩxũ chayaxuxũ. ¹⁷ ¿Éxna pema nagu
 perüxĩnüëgu rü yema duũxügü ga petanüwa
 chamugüxũwa pexũ chawomüxẽẽ? ¹⁸ Rü Titumaã
 nüxũ chixu na petanüwa íyadauxücèx. Rü namaã
 yéma chanamu ga yema to ga taeneẽ. ¿Éxna
 pema nagu perüxĩnüëgu ga Titu rü pexũ yéma
 nayawomüxẽẽ? ¿Tama éxna aixcüma yĩxũ na
 chauxrüũ meã na namaxũxũ rü chauxrüũ
 mexũgu naxĩnüxũ ga Titux? ¹⁹ Bexmana pema
 tá nagu perüxĩnüë rü ngẽmaãcü tidexagü,
 erü togüëtüwatama tachogüchaũ. Natürü,
 Pa Chaueneëgü ya Pexũ Tangechaũgüex, rü
 Tupanapëxewa rü Cristuégagu nixĩ i tidexagüxũ
 na yexeraãcü meã Tupanaãxũ peyaxõgüxücèx
 rü yexeraãcü meã na pemaxëxücèx. ²⁰ Erü
 chaxoegaã rü ngẽxguma wena pexũ íchayadëuxgu,

rü ngürüächi tama choma chanaxwèxexüãcüma ípemaxẽ, rü ngẽmacèx i pema rü tãütáma chomaã petaãëgü. Rû chaxoegaãë erü ngürüächi tá pexü ichayangau na pegüchi ípexaieü, rü pegüarü ngẽmaxüçèx pixãüxãchigüxü, rü pegümaã penuëxü, rü pegüguxicatama íperüxĩnüëxü, rü pexoregütèèxgüxü, rü toguãxü pixuxü, rü pegü picuèxüügüxü, rü chixexü ípexüexü rü ngẽmaãcü chixri ípemaxëxü. ²¹ Rû chaxoegaãë rü ngëxguma wena petanüwa chaxüxgu, rü ngürüächi Tupana rü pegagu tá choxü naxãnexëë. Rû ngürüächi ngechaü tá choxna pexã, erü muxëma i petanüwa rü marü ñuxgumama pecadu taxügüecha, rü tama nüxü tarüxoechaü na Tupanapëxewa chixexü taxügüxü rü naĩ i ngemaãmare na tamaxëxü rü guxüma i togü i chixexü na taxügüxü.

13

Pauru nayaxucuxë ga yema yaxõgüxü ga Corĩtiucüãx rü ñuxüchi nüxü narümoxë

¹ Ñuxma rü norü tomaëxpüxcüna tá nixĩ na petanüwa chaxüxü. Rû Tupanaãrü ore rü tamaã nüxü nixu rü ngëxguma texé chixexü üxgu rü taxre rü ëxna tomaëxpüx i duüxügü nüxü daugügu rü nüxü yaxugügu na aixcüma yĩxü, rü aixcüma tá poxcu tümamaã taxuegu ya yíxema chixexü üxe. ² Rû ngẽmacèx i pema i üpamamatama pecadu ügüechaxe rü guxãma i pema ya chixri maxëxë, rü ñuxma na woo pexna chayaxüguxü rü wenaxãrü pexna nüxü chacuèxãchixëë rü ngëxguma tá ngema chaxüxgu rü aixcüma tá chanamexëë i guxüma i ngẽma chixexü i petanüwa ngëxmaxü, rü tãütáma

chanangupetūxēēmare i ngēma. ³ Rū pema na naxcèx iperūdaunūxū na Cristu chowa idexaxū, rū ngēxguma ngema chaxūxgu, rū ngēxguma tá nixī i nūxū pedauxū na aixcūma chowa na yadexaxū ya Cristu. Rū nūma ya Cristu rū chowa tá pexū nūxū nadauxēē na tama naturaxū natūrū aixcūma yanguxēēāxū i norū ore rū tūxū napoxcuexū ya yixema chixexū ūgūxe. ⁴ Rū aixcūma nixī ga Cristu ga ñoma wūxi ga duūxū i turaxūrūū nūgū yaxīxēēxū ga yexguma curuchawa yapotagu. Natūrū i ñuxma rū Tupanaārū poragagu namaxū. Rū ngēxgumarūū i toma na norū duūxūgū tixīgūxū, rū taturae i toxonewa. Natūrū ngēma na norū duūxūgū tixīgūxū, rū Tupanaārū poragagu tá tamaxē na pexū tarūngūxēēgūxūcèx. ⁵ Rū name nixī i pegūtama pengugū na nūxū pecuāxūcèx ngoxi aixcūma meā peyaxōgū. Rū name nixī i pegū pengugūarū maxūāx rū ngoxi Tupanapēxewa pime. ¿Tama ēxna nūxna pecuèxāchie na Ngechuchu ya Cristu rū pewa nangēxmaxū ega aixcūma peyaxōgūgu? ⁶ Rū chierūna nūxū pecuèxgu na toma rū tama orearū uruūgūnetamare na tixīgūxū. ⁷ Rū Tupanana naxcèx taca na taxuūma i chixexū na pexūgūxūcèx. Rū tama duūxūgūpēxewa togū ítarūtagūxūcèx nixī na ngēmaācū tayumūxēgūxū. Natūrū Tupanana naxcèx taca i ngēma na aixcūma meā naxcèx pemaxēxūcèx woo duūxūgū nagu rūxīnūēgu na toma rū ítatūemarexū. ⁸ Toma rū taxucūrūwama chixri nachiga tidexagū i Tupanaārū ore i aixcūma ixīxū, erū toma rū naetūwa tachogū i ngēma ore. ⁹ Rū tá tataāēgū ega aixcūma peporaegu i perū maxūwa rū ngēmacèx natauxgu i tacūcèx pemaā

na taporagaexŭ. Rŭ Tupanana tá naxcèx tacaama na pexŭ naporaexēxŭcèx i perŭ maxŭwa na dŭxwa aixcŭma mexŭ i norŭ duŭxŭgŭ na pixŭgŭxŭcèx. ¹⁰ Rŭ naxŭpa na pexŭ na íchayadauxŭ nixŭ i pexcèx chanaxŭmatŭxŭ i ñaã popera, na ngēxguma ngema changuxgu rŭ nataxuxŭcèx i tacŭcèx pemaã na chaporagaxŭ. Erŭ tórŭ Cori choxŭ namu na pexŭ charŭngŭxŭcèx na yexeraãcŭ meã peyaxŭgŭxŭcèx, rŭ tama chixexŭ pemaã na chaxŭxŭcèx nixŭ i choxŭ namuxŭ. ¹¹ Rŭ ñuxma na ichayacuèxēxŭ i ñaã popera, Pa Chaueneġgŭx, rŭ chanaxwèxe i meã pexŭ naxŭpetŭ rŭ naxcèx pedau na ñuxãcŭ aixcŭma meã Tupanacèx pemaxēxŭ. Rŭ name nixŭ i pegŭ petaãēxēġgŭ rŭ wŭxigu perŭxŭnŭē rŭ meã yaxna pegŭmaã pexŭnŭē rŭ aixcŭma pegŭ pengechaŭġgŭ. Rŭ nŭma ya Tupana ya tŭxŭ ngechaŭcŭ rŭ tŭxŭ rŭngŭxmŭēxēġcŭ, rŭ guxŭgutáma pemaã inarŭxãŭx. ¹² Rŭ chanaxwèxe i wŭxichigŭ i pema rŭ pegŭ pengechaŭġgŭãcŭma pegŭ perŭmoxġgŭ. ¹³ Rŭ guxŭma i togŭ i taeneġgŭ i yaxŭgŭxŭ rŭ pexŭ narŭmoxġgŭ. ¹⁴ Rŭ ñuxma rŭ chanaxwèxe i tórŭ Cori ya Ngechuchu ya Cristu pexŭ narŭngŭxŭē, rŭ Tanatŭ ya Tupana rŭ pexŭ nangechaŭ, rŭ Naã i Ŭnexŭ rŭ guxŭguma pemaã inarŭxãŭx.

Rŭ nuãma pexna,
Pauru

**Tupanaarü Ore i Tóru Cori ya Ngechuchu ya
Cristuchiga
New Testament in Ticuna (PE:tca:Ticuna)**

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files dated 29 Jan 2022

9d5dc22a-30be-5d26-85a9-76047f4c89e6